



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretionem Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

Cap. 13. Suspiria amantis animae pro perfectis

urn:nbn:de:hbz:466:1-9969

10. Da mihi, Domine, vulnera tua : abhorreo enim videre cor meum, nisi vulneribus plenum, cum te adeo crudeliter pro me videam crucifixum. Non possum vivere sine vulnere, cum te undique videam vulneratum.

CAP. XIII. *Suspiria amantis animæ pro Perfectis.*

Perfectos appello, non ex omni parte : quis enim in hoc mundo ? Imò, ut verissime scribit Bernardus Drogoni Monacho, *Nemo perfectus est, qui perfectior esse non appetit : & in eo quisque perfectiorem se probat, quod ad maiorem tendit perfectionem.* Perfectos igitur voco expurgatos à peccatis, ornatos virtutibus, qui in humilitate & charitate magnos jam progressus fecerunt & ad intimam cum Deo unionem ferventi affectu aspirant. Quia verò perfectio in amore Dei consistit, motus anagogici ad Perfectorum statum pertinentes, ex amore potissimum desumuntur, ut ex subjectis formulis apparet.

DECAS I.

1. **O** Dulcedo cordis mei, ô vita animæ meæ, ô essentia essentiæ meæ & jucunda requies spiritus mei, abstraheme ab omnibus creaturis, ut solum requiescam in te.
2. O Domine Deus meus, spes mea & refugium meum, ô dilecte votorum meorum, quando omnem dissimilitudinem & imperfectionem assumes in me ?
3. O charorum omnium charissime : ô sponse floride, sponse melliflue, quando me ornabis illis monilibus, quibus tibi placebo ?
4. Trahe me post te, sponse dulcissime ; ut alacriter, purè, perseveranter curram in odorem unguentorum tuorum.
5. Effice me hominem secundum cor tuum, præpara tibi in me gratam habitationem, ut ad me venias & mansionem apud me facias.
6. Inebria me vino charitatis tuæ, ô pulcherrime ana-

tor mens, uni me tibi intimè & me totum transfura in te.

7. O ignis increate, quando me totum concremabis flamma ardentissima amoris tui? quando perempta in me omni proprietate totus tuus ero?

8. O dilecte mi, quem solum quæro, quando mihi pulsanti & gementi aperies? quando teipsum mihi manifestabis & dices, Salus tua ego sum?

9. O immensa dulcedo mea, quando me totum in te rapies & absorbebis & abscondes? Quod enim est mari absorbere unam guttam, hoc tibi est absorbere me.

10. O felicitas mea, ô totum & solum gaudium meum, quando sublatis omnibus impedimentis introduces me in cubiculum gloriæ tuæ & me tibi inseparabiliter agglutinas?

DECAS II.

1. **Q**Uæsiui vultum tuum: vultum tuum, Domine, requiram: frustra enim laboro, quamdiu te non quæro.

2. Nolo te sequi, Domine, per viam consolationum & delectationum; sed veri & puri amoris. Nolo id quod egreditur à te, sed te ipsum solum. Te solum volo, te solum desidero: nihil mihi extra te.

3. In te, Domine, est omne esse meum, omnis delectatio mea, omne bonum meum: Si quid meum dico, si meipsum nomino, te solum intelligo, qui solus meus es, & omnis essentia mea in te est.

4. Anima mea sicut terra sine aqua tibi. Effunde ergo, clementissime Deus, largam super me benedictionem de rore cœli & de pinguedine terræ viventium.

5. Utinam disrumperes cœlos & ad me descenderes, ut durities mea liquefacta deflueret & amore tuo totus ignitus inenarrabilibus te gemitibus invocarem!

6. Heu mihi, quia incolatus meus prolongatus est & cogor ibi vivere, unde mallet abesse: cogor abesse à te, cum quo tantopere cupio permanere.

7. O Amor! quàm absconditus, quàm ignotus es! Te cupio, Domine, nihil aliud. Præbe mihi cor tuum & accipe meum.

8. O si possem velocissimè totam terram peragrarè & clamore valido ubique vociferari, Vivat amor Jesu Christi: Vivat amor Jesu Christi.

9. O superlucida & delitiosa Trinitas unus Deus, pasc me tuis influxibus. O simplicissimum & jucundissimum bonum, ô bonum incommutabile, imple me te ipso: transfer in te originem meam: introduc me in fundum animæ meæ.

10. O charum principium meum, quando te feliciter inveniam? quando te ardentissimè diligam? quando me totum in te rapies? quando me totum absorbebis & sine medio tibi unies?

DECAS III.

1. **Q**Uando obdormiam & requiescam in te, pax mea dulcissima? quando plenè aspirabit mihi Divinitatis tuæ fragrantia? quando mihi exorietur dies sempiterna tuæ manifestæ visionis?

2. Per tuum cor transverberatum transfige, amantissime Jesu, cor meum jaculo amoris tui, ita ut nihil terreni continere possit, sed à sola efficacia tuæ Divinitatis contineatur.

3. Ave Jesu sponse mellifluæ, saluto & veneror te omnium electorum tuorum affectu. Excita & rege spiritu tuo vivifico omnes motus cordis mei.

4. O amor meus & omne gaudium meum, quando inclinabitur umbra mortalitatis & aspirabit dies æternitatis? quando depositâ sarcinâ corporis hujus cum Sanctis tuis te perenniter laudabo?

5. Recipe me, ô floride sponse, inter suavissimos amplexus amoris tui, quibus constrictus spiritus meus totus ardeat & comburatur.

6. O bonum super omne bonum, ô finis sine fine,

quando fruar te sine modo & sine fine?

7. Pulcher es, dilecte mi & amabilis valde, non carni & sensui; sed animæ credenti, mundum cor habenti & ad invisibilia se transferenti.

8. Dominus meus & Deus meus, amem te solum propter te & nihil amem nisi in te.

9. O suavissime Cæli splendor adure cor meum potentissimo charitatis incendio: tibi viscera mea sacrifico, ut ea æternis flammis comburas.

10. Cupio, Domine Jesu, ut quories aërem ad me attraho, te ipsum cordiali affectu intra me attraham, quatenus omnes cogitationes, verba & opera mea tuis cogitationibus, verbis & operibus uniantur, & sic unita Deo Patri ad maiorem ejus gloriam repræsententur.

DECAS IV.

1. **D**A mihi, Domine, ut te videam sine forma corporea, sine specie imaginaria, sine luce creata. Trahe me post te extra me & extra omnes creaturas.

2. Malo, Domine, ex voluntate tua acerbissimas inferni pœnas sine fine tolerare, quam sine te gaudiis perfrui sempiternis.

3. Demerge, dilectissime mi, parvulam guttam spiritus mei in immenso pelago bonitatis tuæ, demerge & absorbe me totum in abyssu infinitæ misericordiæ tuæ.

4. Veni suspirata quies amantis animæ meæ, ut nulli mihi dies, nullæ noctes eant sine te, nullus mihi somnus sine te: tibi soli vivam & moriar.

5. Quis ego sum & quis es tu amor meus? Numquid non multum esset, si te permitteres à me amari? sed & insuper te amari præcipis & mihi mortem sempiternam minaris, si te non amo.

6. Clementissime Pater, sicut tu ab omni æternitate voluisti, antequam ego essem, ita fiat: charior est enim mihi tua gratissima voluntas, quam operandi libertas.

7. Quando me lætificabis in regno tuo, Domine Deus

meus, clarissimo vultu tuo? Quando omnia quæ credo, lego & audio de te & gloria tua, clarè & intuitivè videbo?

8. Sileat ante te omnis creatura, Deus meus: tu solus mihi loquaris, ad sis & illumines, qui es omnia in omnibus & super omnia amabilis & gloriosus.

9. Vulnera cor meum tam potenti jaculo dilectionis tuæ, ut omnis terrena consolatio amara mihi reddatur & omni solatio creaturarum libenter caream.

10. Extingue, Domine, omnes extraneas imagines in corde meo, ut pacem nullibi, sive delectationem vel quæram, vel inveniam, nisi in te dulcissime Deus meus.

DECAS V.

1. **O** Charitas Deus meus, fac me obsecro unum tecum, sicut tu & Pater unum estis & sufficit mihi.

2. Utinam, suavissime Jesu, ea flamma amoris arderem, qua ardent Seraphim, qua ardet Mater tua, qua ardes tu!

3. O si possem ab omnium cordibus amorem, qui non est tuus, evellere & tuum inferere, ut amore tuo omnes arderent & languerent!

4. Amo te Deus meus, quia Deus es. Amo te æternitas mea, quia æternus es. Amo te immensitas mea, quia immensus es.

5. In amoris signum gratulor tibi, Deus meus, Divinitatem tuam, simplicitatem tuam, æternitatem tuam, omnesque tuas perfectiones, quæ ita sunt in te, ut idem sint quod tu.

6. Utinam omnia quæ cogitavi, quæ sum loquutus & operatus, ex puro tui amore semper fuissent! Utinam te semper amassem!

7. O si possem, Deus meus, retrovertere annos meos & peractæ ætatis spatia amoris tui actibus replere! ô si te semper dilexisssem cum alia extra te dilexi!

8. Nihilum mei præcessit me à diebus æternitatis tuæ, Deus æterne; nunc verò exulto tibi factori meo & cupio

annihilari quicquid in me terrenum est, ut tu solus vivas in me.

9. O æternitas quàm clarè luces, quàm blandè, quàm præcisè, quàm in puncto ! Ad te secedo à mundo isto sensibili : in te meum solatium & recreatio est post negotia vitæ humanæ, post tædium vitæ labentis.

10. Tu desiderium collium æternorum, dulcissime Jesu : tu desideratus cunctis gentibus : tu sponsus, tu rex cordium : tu amor meus & omne bonum meum.

DECAS VI.

1. **T**U scis Domine, quia si possem, omnem tibi laudem, gloriam & honorem tribuerem, quibus te laudant, glorificant & honorant omnes Angeli & Electi tui ; sed quia impotens ad hoc sum, suscipe saltem desiderium meum & bonam voluntatem.

2. Exclude à me, Deus, omnia impedimenta gloriæ tuæ & in eo statu me constitue, quem aptiorem fore nosti, ut major tibi gloria ex me proveniat.

3. Possideam te in medio cordis mei, beatitudo sempiterna, possideam te, summa dulcedo animæ meæ.

4. Me tibi resigno, Creator meus, purè propter te ad omnia officia, loca, casus, eventus, statumque animæ & corporis, qui tibi placuerit.

5. Nihil à te peto, Domine, nihil volo, nisi pro majori gloria tua. Quòd si per ignorantiam, vel errorem aliud peterem, nolo exaudiri.

6. Si tibi æquale præstatur obsequium ; malo, Domine, desolationem, quàm consolationem, ut pro tui amore aliquid patiar internæ afflictionis.

7. Quia sine te nihil possum pati pro te, da mihi multam & magnam gratiam, ut multa & magna patiar pro amore tuo.

8. Major es omni laude, Deus meus ; & ob id gaudeo, quia quicquid obsequii omnes puræ creaturæ præstare tibi quocumque modo conantur, longissimè impar est dignitati & magnitudini tuæ.

9. Quicquid virtutum, piorum actuum, & affectuum in libris editis & edendis describitur; quicquid fieri potest tibi gratum & acceptum, id omne approbo, & volo, & cum gratia tua perficere cupio,

10. Utinam possem, Deus meus, aliquid hoc momento efficere, quod summè tibi placeat! En hoc quod nunc aggredior purè ad hoc dirigo, ut maximam in eo habeas complacentiam.

DECAS VII.

1. **Q**Uæso te, Domine, ne patiaris quidquam in me, quod non sit usquequaque tuum & divinum; & si quid est, illud protinus evelle.

2. Si scirem, Deus meus, me fore annihilandum, adhuc tibi omni studio servirem; non enim tibi servio propter me, sed propter te.

3. Da, bone Jesu, ut oratio illa tua suam vim in me habeat, ut sicut tu in Patre, & Pater in te est; ita ego tecum unus sim voluntate, amore, opere, moribus, & vita.

4. Extingue me, Domine, in corde omnium hominum; & cunctos homines in corde meo occide, ut mihi mundus crucifixus sit, & ego mundo.

5. Mitte mihi Deus quancumque volueris afflictionem & crucem; & in omni tribulatione præsta ut reum me fatear & cognoscam, & ut meipsum contemniam.

6. Hactenus quosdam amavi, qui me non amabant; jam te amabo, amator æternæ, qui me amasti antequam te novissem; quem amare virtus summa est, à quo amari felicitas.

7. De profundis cordis mei clamo ad te, suavissime Deus, ut auferas à me vanissimum amorem corporæ pulchritudinis, & me totum transferas ad purissimum amorem decoris tui.

8. Illabere, precor te, in penetralia cordis mei, & imprime mihi servo tuo dulcissimam & admirabilem spe-

ciem tuam, ut quiescam in suavitate præsentiæ tuæ.

9. Veni Domine, amor meus, gaudium meum, & corona mea: veni & noli amplius tardare, ne ex nimio desiderio sine sensu efficiar.

10. Scribe, dulcis Jesu, nomen tuum in corde meo, & amorem tuum mellifluum per jugem memoriam pectori meo inscribe.

DECAS VIII.

1. **V**incat nequitiam meam, Domine, immensa bonitas tua, & imaginem tuam in me recognosce, quamvis deturpatam.

2. Revertor ad te felicissimum principium meum, dulcis origo & finis meus: esto deinceps totum ac solum cogitationum mearum objectum.

3. O unum divinum, te solum desiderat cor meum, libera me ab omni multiplicitate.

4. Diligam te, Deus, pro dono tuo, & pro modo meo, exiguo quidem & minus justo; sed non possum ultra quàm possum: potero autem plus, cùm plus donare dignaberis, nunquam tamen prout dignus haberi.

5. O quàm beati sunt illi, qui edunt & bibunt ad mensam tuam in regno tuo, quoniam te ardentè diligunt, & te fruuntur in lætitiâ & exultatione. Ego autem hic fame pereor, & projectus in cinere & caligine lumen cœli non video.

6. Sitio te clarè cognoscere, esurio te perfectè diligere, nec desiderium meum adipisci valeo. Obsecro, Domine, si inveni gratiam in oculis tuis, ostende mihi faciem tuam.

7. Fac mihi, Domine, quodcunque placitum fuerit in conspectu tuo: in manibus tuis ego sum, & corpus meum, & spiritus meus: quocunque pervenero laudabo te, & exultabo vehementer.

8. Satia animam meam ad te suspirantem, felicitas

mea, & reple esurientem bonis tuis.

9. Dejiciantur, quæso, omnia simulacra de throno gloriæ tuæ, ut tu sis solus regnans in corde meo, nec sim ego ampliùs miserabiliter instabilis, & fugitivus à te.

10. Uniat me sibi verbum Dei, gignat seipsam in me sine intermissione æterna sapientia: & pro minimo mihi erit, si me despiciant cælum, & terra, & omnia quæ in eis sunt. Quod si me repuleris ab osculo tuo, non poterunt me omnia, quæ infra te sunt, consolati.

DECAS IX.

1. **V**eni gaudium meum, lumen oculorum meorum: veni amor meus, lux incomprehensibilis, imple omnes potentias animæ meæ intus & foris, ut nihil nisi te videam, cogitem, amem, & desiderem.

2. Tu dixisti Domine: Ducam eam in solitudinem, & ibi loquar ad cor ejus. Et quid aliud est solitudo, nisi te solum amare, in te solo quiescere?

3. O divina solitudo tam concupiscenti animo desiderata, quando fiet istud, ut in te omnino quiescam?

4. Heu me, quia non diligo te, vita animæ meæ, nam si verè te diligerem, semper te in corde haberem; scriptum est enim: Ubi est thesaurus tuus, ibi est & cor tuum.

5. Congrega nos in unum, potentissime amator, data est enim tibi omnis potestas in cælo, & in terra.

6. Trahe me post te, suavissime Redemptor, qui dixisti, Si exaltatus fuero à terra, omnia traham ad me ipsum.

7. Accende cor meum igne tuo, Deus meus; tu enim ignis comburens es, & facis ministros tuos ignem urentem.

8. Deus meus es tu, qui infinita tua bonitate locupletissimus, nec bonorum meorum, nec alterius cujusque rei indigentiam habere potes. Et in hoc gaudeo & exulto

quod nulla tibi perfectio, nec quidem per imaginationem adungi possit.

9. Domine Jesu, quantum te diligunt, qui te novērunt ! Pater tuus te diligit, Spiritus sanctus te diligit; omnes Angeli, omnes Electi & amici tui amore tuo exardescunt; & ego solus frigidus ero?

10. Libera me Deus à multiloquio, quod patior intus in anima mea: non enim cogitationibus taceo, etiam si vocibus taceam. Multæ sunt cogitationes meæ, quales tu nosti cogitationes hominum, quoniam vanæ sunt. Da mihi eis non consentire, nec immorari, ne me impedian ab amore tuo.

DECAS X.

1. **O** Amor, quàm parum cognosceris & amaris! Accede ad me, ô Amor, & si nullibi requiem invenis, te totum transfunde in me, æterne & suavissime Amor.

2. Semper ardeat ignis amoris tui in altari cordis mei, & in tantum crescat incendium, ut non solum sacrificium, sed & ipsum altare comburat, & consumet.

3. Nihil me lætificet, Domine Jesu Christe, nisi tu: nihil me contristet, nisi culpa mea, & offensio tuæ Majestatis.

4. Tu es unicum desiderium meum, æterna Sapientia, tu thesaurus quem quæro, tu beatitudo ad quam suspiro.

5. Quàm pulcher es, dilecte mi, quàm speciosus in deliciis tuis! Utinam potentissimus amor tuus omnem extraneum amorem in me occidat! Quicquid videro, quicquid audiero, quicquid sensero; tu solus intres, & possideas cor meum.

6. O Amor potentissime, qui lutum transfiguras in Deum, transforma me totum in te. Nimis saxeum est cor meum, nisi molliatur sanguine tuo: nimis distractum est, nisi colligatur in latere tuo.

7. O æterna veritas & vera charitas & chara æternitas! Tu es Deus meus, ad te suspiro die ac nocte. Te amo, te diligo & magis amare desidero: percussisti enim cor meum verbo tuo, ut amarem te.

8. Quid amore dulcius? quid securius? quid suavius? Quare sagittis ejus non est transfixum cor meum? Ergone amor tuus circundat me undique & nescio quid sit amor? cur sic maneo insensibilis? cur me magis attraxit creatura, quam Creator?

9. Venustissime Jesu, vita mea perennis, per quam vivo & sine qua morior, vita dulcis & amabilis; concede ut tibi jungar, te complectar & suavi charitate soporatus in te obdormiam.

10. Quando te videbo, dulcissime Deus? quando apparebo ante faciem tuam? quando transibo in admirabilem domum tuam? quando videbo te in terra viventium? In ista enim terra jumentorum mortalibus oculis videri non potes, sed in regione Angelorum videbimus te, sicuti es.

CAP. XIV. *Laudem virtutis in actione consistere.
Actus diversarum virtutum.*

NOrunt omnes, qui vel primis Philosophiæ rudimentis imbuti sunt, omnem vim & laudem virtutis in actione sitam esse. Habitus enim virtutum, sive à Deo infundantur, sive acquirantur à nobis, data opportunitate in opus exire debent: & hoc est primarium eorum munus, bonæ actionis principium & fontem esse; & potentiam, quam imbuunt, disponere ad hoc, ut certius & facilius operetur. Causa exigui profectus in vita spirituali non defectus cognitionis aut desiderii, sed defectus executionis esse solet. Aliud est scire multas divitias, aliud possidere: nec notitia divitem facit, sed possessio. Actiones autem, quibus unaquæque virtus aut generatur aut crescit, duplices sunt, internæ & externæ. De externis non est hîc differendi locus, nec earum usus semper occurrit.